



Schweizerische Eidgenossenschaft  
Confédération suisse  
Confederazione Svizzera  
Confederaziun svizra

Eidgenössisches Departement für Auswärtige Angelegenheiten EDA  
Département fédéral des affaires étrangères DFAE  
Dipartimento federale degli affari esteri DFAE

**Posiziun da la Svizra davart il tschintgavel  
Parairi dal Comité consultativ per la  
Convenziun da basa dal Cussegl da  
l'Europa per proteger las minoritads  
naziunalas**

zercladur 2023

## Cuntegn

1.	Introducziun e remartgas generalas .....	1
2.	Posiziun davart tschertas mesiras immediatas recumandadas .....	2
3.	Posiziun davart ulteriuras recumandaziuns.....	5
4.	Recumandaziuns dal Comité consultativ en il sectur da la participaziun .....	9
4.1	Participaziun en general .....	9
4.2	Mesiras concernent la pandemia da COVID-19 .....	9
5.	Recumandaziuns dal Comité consultativ en il sectur da las minoritads linguistica .....	10

## 1. Introducziun e remartgas generalas

La Svizra ha ratifitgà la Convenziun da basa per proteger las minoritads naziunalas (numnà qua sutvert «Convenziun da basa») l'onn 1998. Per la Svizra è questa convenziun entrada en vigur il 1. da favrer 1999.

Per ch'ina cuminanza possia vegnir renconuschida sco minoritad naziunala sto ella ademplir differents criteris da la Decleraziun interpretanta che la Svizra ha fatg a chaschun da la ratificaziun. Tenor questa decleraziun sto ina grappa da persunas esser numericamain pli pitschna ch'il rest da la populaziun da la Svizra u d'in chantun, posseder la naziunalitat svizra, tgirar dapi ditg las relaziuns existentas, solidas e persistentas cun la Svizra ed esser animada da la voluntad da mantegnair communablamañ quai che fa ora l'identidad cuminaivla da la Svizra, en spezial sia cultura, sias tradiziuns, sia religiun u sia lingua.»

Sco minoritads naziunalas èn renconuschidas en Svizra:

- las persunas che appartegnan a las minoritads linguisticas naziunalas, q.v.d. sin plaun naziunal las persunas da lingua taliana, rumantscha e franzosa sco er sin plaun regiunal las persunas da lingua franzosa en il chantun Berna e las persunas da lingua tudestga en ils chantuns Friburg e Vallais;
- ils Jenics e Sinti/Manouches svizzers cun domicil stabel e quels cun moda da viver nomada sco er
- las persunas che appartegnan a las communitads gidieus en Svizra.

Il 1. d'october 2021 ha la Svizra inoltrà al Comité consultativ da la Convenziun da basa ses tschintgavel Rapport concernent la realisaziun da la Convenziun da basa (cumbinà cun l'otgavel Rapport concernent la realisaziun da la Charta europeica da las linguas regiunalas u minoritaras). A chaschun da sia 78avla dieta dals 13 da favrer 2023 ha il Comité consultativ deliberà ses tschintgavel Parairi davart la Svizra. Quest Parairi è vegnì transmess ils 27 da favrer 2023 a la represchentanza permanenta da la Svizra en il Cussegl da l'Europa. En il Parairi è la Svizra vegnida supplitgada da prender posiziun en scrit fin ils 28 da zercladur 2023. La posiziun al Comité consultativ dal Cussegl da l'Europa vegn prendida en num dal Cussegl federal svizzer ch'è responsabel per ils affars exteriurs e pia er per l'observanza da las obligaziuns internaziunalas da la Svizra. Numerus temas sco la planisaziun dal territori e la furmaziun pertutgan però la cumpetenza dals chantuns ch'èn er responsabels per realisar la Convenziun da basa. Els èn vegnids integrads correspondantamain en l'elavuraziun da la posiziun.

La posiziun è vegnida redigida da la Direcziun da dretg internaziunal public (DDIP) dal Departament federal d'affars exteriurs (DFAE) en collavuraziun cun ils suandants posts da servetsch da l'administraziun federala: l'Uffizi federal da cultura (UFC), il Servetsch per il cumbat cunter il rassisseм (SCRA), l'Uffizi federal da statistica (UST), l'Uffizi federal da giustia (UFG), l'Uffizi federal da polizia (fedpol), l'Uffizi federal da communicaziun (UFCOM), la delegada federala per la plurilinguitad ed ils Servetschs linguistics centrals da la Chanzlia federala. La Cumissiun federala cunter il rassisseм (CFR), ina cumissiun extraparlamentara ed independenta, è medemamain vegnida consultada. Tut ils chantuns sco er la Conferenza svizra da las directuras e dals directurs chantunals da l'educaziun publica (CDEP) èn medemamain vegnids supplitgads da prender posiziun. Tras lur federaziuns represchentativas èn vegnidas consultadas er las vischnancas e las citads, sco er la Fundaziun «In futur per ils viagiants svizzers».

La posiziun qua avant maun è vegnida redigida respectivamain translatada, sco il tschintgavel Rapport da la Regenza svizra concernent la realisaziun da la Convenziun da basa, en las quatter linguas naziunalas da la Svizra: en franzos, en tudestg, en talian ed en rumantsch. Il tschintgavel Parairi dal Comité consultativ che stat a disposiziun a la Svizra per franzos e per englais, è medemamain vegnì translata da l'administraziun federala en las quatter linguas naziunalas. Tut ils documents vegnan publitgads sin la pagina d'internet dal DFAE.

Dals 2 fin ils 6 da matg 2022 ha ina delegaziun dal Comité consultativ visità la Svizra. Questa visita è vegnida fatga en coordinaziun cun il Comité d'experts da la Charta europeica da las linguas regiunalas u minoritaras che ha deliberà ses otgavel Rapport d'evaluaziun davart la Svizra ils 30 da zercladur 2022.

Durant lur visita èn las expertas ed ils experts sa scuntrads a Cuira, a Friburg ed a Berna cun represchentantas e represchentants da las differentas minoritads e da las differentas linguas regiunalas u minoritaras. A Cuira en il chantun Grischun ha la delegaziun discurrì cun represchentants d'autoritads chantunals dal Grischun, en spezial cun la partiziun *Promoziun da la cultura dal Grischun* da l'Uffizi da cultura. Medemamain a Cuira ha già lieu in barat cun il manader dal *Osservatorio Linguistico della Svizzera italiana OLSI*. Ultra da quai ha la delegaziun discurrì cun las autoritads dals chantuns bilings Berna e Friburg. Plinavant han las expertas ed ils experts – accumpagnads da represchentantas e

represchentants da l'Uffizi federal da vias (UVIAS), da l'Uffizi federal da cultura (UFC) e da la Fundaziun «In futur per ils viagiants svizzers» – visità la piazza da transit previsa per ils viagiants esters a Wileroltingen en il chantun Berna, sco er la piazza da transit Thun Allmendingen, medemamain en il chantun Berna. Cun la manadra dal Servetsch social da la citad da Berna ha la delegaziun er discutà davart dumondas pertugant la concepziun da las visitas da scola dals uffants dals viagiants.

Ultra da quai han gi lieu differents discurs cun las represchentantas ed ils represchentants da l'administraziun federala che s'occupan directamain da la protecziun da las minoritads e da las gruppas minoritaras. Da quai fan part la Direcziun da dretg internaziunal public (DDIP), l'Uffizi federal da cultura (UFC), la la plurilinguitad, la delegada federala per la plurilinguitad, l'Uffizi federal da statistica (UST), l'Uffizi federal da giustia (UFG) sco er il Servetsch per il cumbat cunter il rassissem (SCRA). A la delegaziun dal Comité consultativ han questas scuntradas servì per sa far in maletg concret ed exact da la situaziun da las minoritads naziunalas e d'autras cuminanzas en Svizra.

Sin sia visita en Svizra ha il Comité consultativ pia pudi – en il barat direct cun las autoritads da tut ils stgalims, cun las represchentantas ed ils represchentants da las differentas minoritads e da las differentas linguas regiunalas u minoritaras sco er cun ulteriuras personas participadas da la societat civila – sa procurar en moda transparenta e cumplessiva las infurmaziuns ch'en stadas necessarias per ses giudicament.

La Svizra dat ina gronda impurtanza a la protecziun ed a la promozion dals dretgs umans essenzials da las gruppas minoritaras. Las Directivas dals dretgs umans 2021-2024 cuntengnan numnadaman la protecziun dals dretgs umans sco in dals quatter accents da la politica exteriura a favur dals dretgs umans dal Departament federal d'affars exteriurs (DFAE).

En vista a l'impurtanza da questa politica exteriura ha il president da la Confederaziun da quella giada Ignazio Cassis definì la diversitat da las linguas, da las culturas e da las opiniuns en Svizra sco punct central da ses onn presidial 2022. La protecziun da las minoritads vegn la finala integrada en las lavurs che la Svizra exequiescha en il rom da las prioritads ch'en vegnidias fixadas per il Cussegl da segirezza da la ONU.

Sut quest aspect conferma la Svizra ses confess per la Convenziun da basa per proteger las minoritads naziunalas ed accentuescha la cintinuaziun da ses engaschament, quai persvadida che la participaziun senza discriminaziun da las minoritads naziunalas a tut ils secturs da la societat ed a la vita politica contribueschia a la stabilitad sociala ed al bainstar d'in pajais.

La Svizra ha prendi enconuschienscha cun gronda attenziun dal tschintgavel Parairi dal Comité consultativ davart la Svizra. Las constataziuns detagliadas ed extendidas dal Comité consultativ mussan, ch'el ha examinà cun quità la situaziun da las minoritads en Svizra e ch'el ha pudi sa far in maletg cumplessiv da l'engaschament naziunal ed internaziunal da la Svizra a favur dals dretgs da las minoritads. Las recumandaziuns a la Svizra dattan perditga dal respect envers la tradiziun constituziunala da la Svizra ed envers la coexistenza da differentas cuminanzas linguisticas, culturalas e religiusas. Ellas tegnan quint da las posiziuns da la Confederaziun e dals chantuns sco er da las organisaziuns pertugadas.

La Svizra apprezziescha la collauraziun constructiva cun ils gremis dal Cussegl da l'Europa per realisar la Convenziun da basa. Per cintinuar en moda efficazia cun il dialog davart las meglras vias per ina protecziun e promozion da las minoritads naziunalas èsi raschunaivel e necessari d'analisar quai ch'e vegni cuntanschì ensemes cun ils posts cumpetents e – sa referind a las recumandaziuns dal Comité consultativ – d'eventualmain prender ulteriuras mesiras da realisaziun. Sco supplitgà dal Comité consultativ è perquai previs – sco già en il quart ciclus da rapport – in dialog consecutiv per examinar las recumandaziuns ch'en cuntengnidas en il tschintgavel Parairi.

En quai che suonda vegnan tractadas las mesiras immediatas recumandadas sco er intginas ulteriuras recumandaziuns dal Comité consultativ.

## 2. Posiziun davart tschertas mesiras immediatas recumandadas

Il Comité consultativ supplitgescha las autoritads da surlavurar lur prescripziuns giuridicas, per pudair realisar senza restricziuns il princip da la nudiscriminaziun e per garantir a las personas che appartegnan a las minoritads naziunalas ils medems dretgs en connex cun l'access als dretgs. Las novas prescripziuns giuridicas duessan cuntagnar ina clera definiziun da la discriminaziun directa ed

indirecta ed enumerar las praticas discriminantas ch'en scumandadas (mesira immediata recumandada en il paragraf 11 resp. 62).

La Constituziun federala da la Confederaziun svizra cuntegna explicitamain in vast scumond da discriminaziun. Sche l'introducziun d'ina lescha generala cunter la discriminaziun è necessaria, è già vegni examinà pliras giadas. In studi independent ch'è vegni redigi per incumbensa da l'administraziun federala, il qual ha examinà la necessitat d'ina tala lescha, ha recumandà expressivamain da desister d'ina tala. Quai cun la motivaziun, ch'il fenomen da la discriminaziun saja uschè complex e multifar, che la deliberaziun d'ina unica lescha na fiss betg cunvegnenta (cf. Center svizzer da cumpetenza per ils dretgs umans CSDU, Der Zugang zur Justiz in Diskriminierungsfällen, rapport da sintesa, Berna, fanadur 2015). Il parlament ed il Cussegl federal èn da l'avis, ch'ils instruments legals existents porschian ina protecziun efficazia cunter discriminaziun. La proposta da codifitgar sectur per sectur il scumond da discriminaziun permetta da dar la resposta instituziunala la pli adattada per mintga sectur specific (p.ex. equalitat tranter dunna ed um, equalitat d'umans cun impediments). Questas mesiras per sectur pon vegnir adattadas u extendidas en cas da basegn. Uschia examinescha il Cussegl federal actualmain d'estender las pussaivladads da protecziun en il sectur dal dretg privat, particularmain en vista a l'access a la giustia.

La protecziun cunter discriminaziun è in dals secturs da promozion en il rom dals programs chantunals d'integrazion (PCI). Ultra da sensibilisar las instituziuns per il tema, duain vegnir rinforzads particularmain il sustegn cumpetent e l'access a la cussegliazion. Ils PCI ch'en vegnids concludids tranter la Confederaziun ed ils chantuns e che vegnan realisads dapi l'onn 2014, correspundan ad in plan d'acziun naziunal per cumbatter cunter la discriminaziun, uschia sco quai ch'el vegn recumandà d'instituziuns naziunals.

Il Comité consultativ suppligescha las autoritads sin tut ils plauns d'augmentar – en collauraziun cun las gruppas d'interess las pli impurtantas, inclusiv las cuminanzas pertutgadas – il dumber da pazzas da staziunament, da passadi e da transit (mesira immediata recumandada en il paragraf 12 resp. 100).

La Svizra è dal medem avis sco il Comité consultativ, concernent l'augment da las pazzas da staziunament. Malgrà las stentas ch'en vegnidas fatgas sin tut ils plauns, n'han fin oz betg pudì vegnir stgaffidas avunda pazzas novas per Jenics e Sinti cun moda da viver nomada. La planisaziun dal territori è en emprima lingia chaussa dals chantuns, entant che las cumpetenças da la Confederaziun sa restrenschon sin la determinaziun da princips. Als chantuns ed a las vischnancas po la Confederaziun conceder contribuziuns (fin maximalmain 50 % dals custs totais) per construir e per sanar pazzas da staziunament per Jenics e Sinti svizzers sco er sustegnair projects da sensibilisaziun per promover l'acceptanza da novas pazzas da staziunament. Per quest intent stattan a disposiziun medis finanzials supplementars durant ils onns 2023 e 2024. Ultra da quai vegn prestada blera lavur da colliaziun e da cussegliazion per far avanzar la planisaziun d'ulteriuras pazzas. Ina part participada centrala è qua la fundaziun «In futur per ils viagiants svizzers» che ha elavurà – cun il sustegn da l'Uffizi federal da cultura (UFC) e da l'Uffizi federal per svilup dal territori (ARE) – in manual il mars 2023 (cf. Fundaziun In futur per ils viagiants svizzers, Handbuch für die Planung, den Bau und Betrieb von Stand-, Durchgangs- und Transitplätzen für fahrende Jenische, Sinti und Roma, Berna, mars 2023). Il manual preschenta buns exempels e fixescha standards per tschertgar, construir e manar pazzas da staziunament. El duai gidar a meglierar las condizioni da viver dals Jenics, Sinti e Roma cun moda da viver nomada.

En sias acziuns s'orientescha la Confederaziun a las finamiras ed a las mesiras dal plan d'acziun Jenics, Sinti, Roma ch'è vegni publitgà l'onn 2016, che cumpiglia differents secturs da la vita (pazzas da staziunament, furmaziun, fatgs socials, cultura) e che vala anc adina. Cunzunt per stgaffir novas pazzas da staziunament è la Confederaziun dependenta da la cooperaziun dals chantuns e da las vischnancas. In monitoring dal plan d'acziun è previs. Elements centrals dal plan d'acziun èn vegnids integrads er en la missiva da cultura 2021-2024. En quella vegni fatg attent al grond basegn da pazzas da staziunament. En la perioda currenta da la missiva da cultura ha la Confederaziun perquai rinforzà sias stentas per sustegnair finanzialmain ils chantuns e las vischnancas a favur da stgaffir pazzas da staziunament supplementaras (cf. Uffizi federal da cultura, Wegleitung für Gesuche zur Unterstützung der Schaffung von Halteplätzen für Schweizer Jenische und Sinti, Berna 2023). La finanziazion da la Confederaziun da pazzas da staziunament e da passadi per Jenics e Sinti svizzers è garantida actualmain tras ils medis finanzials ch'en previs en la missiva da cultura 2021-2024.

La promozion e la coordinaziun naziunala da pazzas per viagiants esters (per il pli) Roma è pli difficile e vegn pir lantschada. Per las uschenumnadas pazzas da transit è vegni elavurà in concept per la planisaziun dal territori, integrond cussegliers guvernativas e cussegliers guvernativs da plirs chantuns. Il concept è avant maun sco sboz (versiun da la primavaira 2023).

Stgaffir novas pazzas da staziunament è ina interresa multifara e lungurusa. Qua saja renvià exemplaricamain al chantun Geneva che ha francà il basegn da surfatschas adattadas gia l'onn 2013 en ses plan directiv. La surfatscha existenta fermamain limitada ed il grond squitsch sin ils bains immobigliars che resulta da quai, èn però facturs cumplexs che difficulteschan da metter a disposiziun talas pazzas. In lieu empermettent è vegni identifitgà l'onn 2022 en la vischnanca dad Avully. Per realisar questa piazza da staziunament dovrà però vastas lavurs da planisaziun. Ultra da quai ston las legislativas chantunalas e communalas acceptar il project. Sin tuts dus plauns è dentant vegni fatg in referendum. En il chantun Tessin vegn examinada la pussaivladad d'endrizzar ina piazza da staziunament stabla per viagiants svizzers. L'emprim sto dentant vegnir spetgada la procedura administrativa ch'è necessaria per quai. Ils exempels mussan, pertge ch'ins n'ha strusch gì success durant ils ultims onns: stgarsezza da las surfatschas utilisablas, resistenza politica, lungs process da planisaziun.

Il Comité consultativ supplitgescha las autoritads da rinforzar lur stentas per cumbatter cunter tut ils generis da rassissem e d'intoleranza, inclusiv d'antiziganissem, antisemitissem, rassissem envers personas da pel stgira ed envers Muslimas e Muslims. Plinavant duessan las autoritads rinforzar lur stentas per impedir la derasaziun da pleuds instigants en las medias socialas, quai en stretga collauraziun cun ils purschiders dals servetschs respectivs (internet service providers) e cun las gruppas da la populaziun ch'èn pertutgadas il pli fitg da pleuds instigants (mesira immediata recumandada en il paragraf 13 resp. 121).

La Svizra considerescha il cumbat cunter rassissem e cunter discriminaziun rassistica, cunter xenofobia sco er cunter pleuds instigants sco obligaziun permanenta. Las numerusas activitads dals differents uffizis federais, dentant er dals chantuns, da las vischnancas e da las citads gidan a far ina politica sistematica da sensibilisaziun e da prevenziun.

En vista a la dimensiun creschenta da pleuds instigants e da rassissem en l'internet ha il Servetsch per il cumbat cunter il rassissem SCRA lantschà l'onn 2020 ina prioritad correspontenta e sustegna dapi lura, sco er auters uffizis federais sco p.ex. l'Uffizi federal da communicaziun (UFCOM), projects specifics che s'occupan da rassissem e d'antisemitissem en l'internet. Dapi l'onn 2021 è activa ina gruppa da lavour interdepartamental, e la Cumissiun federala cunter il rassissem CFR ha mess en funcziun la piattaforma d'annunzia online per pleuds instigants rassistics [www.reportonlinerracism.ch](http://www.reportonlinerracism.ch).

Sin basa d'ina iniziativa parlamentara redigia l'Uffizi federal da communicaziun (UFCOM) actualmain in rapport che preschenta las mesiras ed ils medis finanzials existents per cumbatter cunter pleuds instigants e che identifitgescha eventualas largias. Quest rapport vegn publitgà il settember 2023.

Sa basond sin differents studis ha il Cussegl federal incumbensà ils 5 d'avrigl 2023 il Departament federal per ambient, traffic, energia e communicaziun (DATEC), integrond l'Uffizi federal da giustia (UFG), d'elavurar novas disposiziuns legalas per regular las piattaformas da communicaziun. Il sboz da lescha vegn spetgà il mars 2024.

Il Comité consultativ supplitgescha las autoritads en tut ils chantuns d'intensivar l'instrucziun e da francar en ils plans ed en ils medis d'instrucziun l'istorgia dals Roma, Jenics e Sinti/Manouches – inclusiv l'istorgia dals Roma, Jenics e Sinti/Manouches ch'èn daventads victimas da l'olocaust. Er la malgiustia che la fundaziun Pro Juventute ha commess, duess vegnir tematisada en ils cudeschs d'istorgia ed en las scolas (mesira immediata recumandada en il paragraf 14 resp. 174).

L'istorgia dals Roma, Jenics e Sinti/Manouches – inclusiv l'istorgia dals Roma, Jenics e Sinti/Manouches ch'èn daventads victimas da l'olocaust e lur dolurusas experientschas tras l'ovra d'agid «Uffants da la via» – è ina part da l'identitat svizra multifara e dat perditga da las epochas da lur persecuziun respectivamain da lur renconuschientscha. L'intermediaziun d'infurmaziuns e da savida davart questi fatgs è perquai in tema fitg important. Cumbain che la Confederaziun ha ina funcziun subsidiara en quest sectur, sa participescha ella per sviluppar unitads d'instrucziun u projects d'instrucziun cun caracter da model che han la finamira da vegnir duvrads pli extendidamain en las scolas. Uschia ha l'Uffizi federal da cultura (UFC) finanzià decisivamain il med d'instrucziun ch'è cumpari dacurt «Jenische, Sinti, Roma – Zu wenig bekannte Minderheiten in der Schweiz». Quest med d'instrucziun è vegni preparà da la gruppa da lavour Jenics-Sinti-Roma, ensemble cun la Scola auta da pedagogia da Turitg («Jenische, Sinti, Roma – Zu wenig bekannte Minderheiten in der Schweiz, Münster, Turitg, 2023»). Igl è planisà da render accessibel il material d'instrucziun er per la Svizra taliana. Per quest intent vegn scritta ina part introductiva respectivamain finala speziala che vegn a sa referir specificamain a la situaziun da vita en la Svizra taliana.

Per gidar las personas d'instrucziun a tractar questi temas, ha il Center d'infurmaziun e da

documentaziun IDES elavurà per mauns da la Conferenza da las directuras e dals directurs chantunals da l'educaziun publica (CDE), in dossier cun il titel «Gedenken an den Holocaust und Verhütung von Verbrechen gegen die Menschlichkeit: Kontext und Informationsquellen für den Unterricht». Il punct da partenza dal dossier è quel, da furnir infurmaziuns utilas e da reflectar las activitads pertutgant questa tematica che vegnan fatgas en il sectur da furmaziun da la Svizra. L'ultima actualisaziun dals meds d'instrucziun ch'en disponibels per commemorar l'olocaust ed il genocid dals Roma, ha gî lieu il schaner 2023.

A regard la realisaziun da questa tematica en ils chantuns vegni fatg attent exemplaricament al chantun Grischun, nua che l'actual Plan d'instrucziun 21 e differents meds d'instrucziun per differents stgalims da scola cuntegnan l'intermediaziun da l'istoria da minoritads religiusas e culturalas. La confruntaziun cun l'olocaust è in cuntegn obligatoric dal plan d'instrucziun. La confruntaziun cun las «mesiras repressivas per motivs da provediment» è in tema impurtant che vegn tematisà en divers meds d'instrucziun e che vegn integrà er en la furmaziun da persunas crescidas respectivamain en la furmaziun professiunala. Il chantun Grischun fa dentant attent a l'incumbensa pretensiua che las scolas han, numnadament d'intermediar numerus temas en moda adattada al stgalim e quai resguardond commensuradament las recumandaziuns respectivas.

Dacurt ha per exemplu il chantun Berna lantschà sut il titel «Berner Zeichen der Erinnerung» ed en stretga collauraziun cun las vischnancas, las autoritads da scola, organisaziuns ecclesiasticas sco er en il dialog cun persunas pertutgadas e cun victimas, tschintg projects parzials, en ils quals i duai vegnir pussibilità da sa confruntar cun il chapitel difficult dal temp da las mesiras repressivas per motivs da provediment e dals piazzamenti en in lieu ester. Per quest intent èn vegnidias preparadas tranter auter materialias d'instrucziun che duain sensibilisar las persunas giuvnas – er en l'inscunter cun persunas pertutgadas e cun victimas – per il dretg sco er per la malgiustia en connexs socials.

### 3. Posiziun davart ulteriuras recumandaziuns

Il Comité consultativ appellescha las autoritads federalas da tgirar in dialog constructiv cun persunas e cun cuminanzas che han – sco p.ex. las persunas che appartegnan a la cuminanza svizra dals Roma – exprimì in interess da far valair lur dretg sin la protecziun da la Convenziun da basa. Tut tenor ils giavischs da las represchentantas e dals represchentants da questas cuminanzas po quest dialog sa focussar sin il fatg, da realisar la Convenziun da basa en moda pragmatica artitgel per artitgel (recumandaziun en il paragraf 15 resp. 40).

La dumonda da duas organisaziuns da renconuscher ils Roma svizzers sco minoritad naziunala en il senn da la Convenziun da basa per proteger las minoritads naziunalas è vegnida examinada dal Cussegl federal cun quità. L'examinaziun cuntegneva tranter auter l'analisa, sch'il criteri da lioms existents dapi ditg cun la Svizra, saja adempli. Las autoritads competentas han consultà istoricras, sociologs ed etnologas sco er ina mediatura ch'è spezialisada per las relaziuns cun cuminanzas nomadas, per chapir meglier las relaziuns istoricas dals Roma cun la Svizra. Auter sco quai ch'igl è vegni menziunà en il tschintgavel Parairi dal Comité consultativ, n'eran pia betg mo las petentas ed ils petents obligads da furnir questa cumprova. L'examinaziun da la dumonda ha dentant mussà, ch'ils criteris per ina tala renconuschientscha n'eran betg ademplids. Il Cussegl federal vuless però accentuar, ch'ils Roma – independentament da la dumonda da la renconuschientscha sco minoritad naziunala – èn ina part integrala renconuschida da la sociedad svizra. En quest regard ha la Confederaziun prendi differentas mesiras ils ultims onns e sa legra, ch'il Comité consultativ prenda enconuschientscha cun bainvulentscha da quest engaschament duraivel.

Las autoritads svizras èn prontas da canticuar cun lur dialog cun las represchentantas ed ils represchentants da las persunas che appartegnan a la cuminanza dals Roma en Svizra, quai per examinar ils basegns da quellas, er en vista a las disposiziuns vertentas da la Convenziun da basa.

Il Comité consultativ recumonda a las autoritads federalas d'optimar ulteriuramain la metodica da la dumbraziun dal pievel. El las cusseglia da far ils pass necessaris per sviluppar metodos da retschertga adequatas e da garantir uschia, ch'i vegnia realisà il dretg da la libra autoidentificaziun a chaschun da l'actualisaziun dals registers da la populaziun. Las autoritads duain sviluppar metodos, cun las qualas po vegnir eruì il dumber effectiv da las persunas che appartegnan a minoritads naziunalas (recumandaziun en il paragraf 16 resp. 48).

Sco remartga preliminara duai vegnir fatg attent al fatg, che las enquistas da sondagi ch'en menziunadas en il tschintgavel Parairi (paragraf 41) èn vegnidias fatgas sin plaun federal e betg sin plaun chantunal.

La Dumbraziun svizra dal pievel vegn reglada da la legislaziun vertenta (Lescha federala dals 22 da zercladur 2007 davart la dumbraziun federala dal pievel [CS 431.112], Lescha federala dals 23 da zercladur 2006 davart l'armonisaziun dals registers d'abitants e d'auters registers uffizials da persunas [CS 431.02] e Lescha federala dals 19 da zercladur 1992 davart la protecziun da datas [LPD; CS 235.1]). Il sistem è concepi uschia, che tschertas minoritads u pitschnas populaziuns parzialas pon vegnir registradas grazia ad infurmaziuns davart la lingua e davart la religiun. Sco menziunà correctamain en il tschintgavel Parairi dal Comité consultativ, èn questas infurmaziuns las sueltas datas che vegnan registradas en la dumbraziun dal pievel, che sa refereschan ad aspects da las minoritads naziunals. Cun in'enquista da structura annuala sa laschan identifgar populaziuns parzialas d'ina grondezza da fin 140 persunas cun in'exactedad acceptabla. Cun datas pooladas sur 3 u sur 5 onns pon vegnir identifgadas populaziuns parzialas d'ina grondezza da 50 resp. 30 persunas cun in'exactedad acceptabla.

Il fatg, ch'i na vegnan registradas naginas datas da gruppas, ch'èn relevantas per il rassissem en la statistica publica da la Svizra, è vegni crititàgia d'auters gremis internazionals e d'organisaziuns da persunas pertutgadas. Uschia han l'Uffizi federal da statistica (UST) ed il Servetsch per il cumbat cunter il rassissem SCRA laschà far in rapport d'experts per examinar questa pratica. Las expertas ed ils experts èn arrivads a la conclusiun, che la revelaziun da datas sin basa da l'appartegnientscha ad ina gruppera da la populaziun potenzialmain discriminada u ad ina «razza», na possia betg esser in'opziun per la statistica publica da la Svizra, quai tant ord vista dal dretg fundamental (en cas d'enquistas obligatoricas) sco er ord vista spezialisada e statistica. Medemamain na pon las variablas davart l'appartegnientscha etnica, davart la biografia da migraziun u schizunt davart la naziunalitat betg registrar cumplettamain las gruppas da la populaziun ch'èn potenzialmain pertutgadas da discriminaziun. Las datas respectivas ston perquai vegnir registradas sco fin ussa a maun d'in grond dumber da differentas funtaunas da datas (statistica publica, datas d'organisaziuns privatas, enquistas quantitativas e perscrutaziun qualitativa) (cf. Gleichbehandlung und Diskriminierung nach Herkunft und ethnokulturellen Merkmalen, Stand und Optionen für die öffentliche Statistik und die wissenschaftliche Forschung in der Schweiz, 18-12-2019, [www.edi.admin.ch/edi/de/home/fachstellen/frb/publikationen/daten-zu-gleichbehandlung.html](http://www.edi.admin.ch/edi/de/home/fachstellen/frb/publikationen/daten-zu-gleichbehandlung.html)).

Las resalvas da la minoritad rumantscha che vegnan menziunadas en il tschintgavel Parairi, numnadament che la metodica da la dumbraziun dal pievel seja insuffizienta per registrar gruppas pli pitschnas da persunas che appartegnan a minoritads naziunals, na vegnan betg acceptadas. Ils resultats da l'Enquista svizra da structura en la quala vegn registrada la lingua, reflecteschan las indicaziuns da las persunas interrogadas, sco quai ch'ellas vegnan dadas en mintga dumbraziun dal pievel sin l'entir mund. Ils resultats da l'Enquista da structura areguard la minoritad rumantscha pon vegnir giuditgads sco buns. La dumber da persunas da lingua rumantscha che vegn stimà per l'entira Svizra importa  $44'354 \pm 1'861$  (4 %) (pooling da las datas da 2016-2020).

La pussaivladad d'inditgar l'appartegnientscha ad ina minoritad u in'appartegnientscha multipla, è dada en la Dumbraziun svizra dal pievel grazia a las indicaziuns davart la lingua e davart la religiun. Sch'ina persuna inditgescha mo ina lingua, è quai en ses bainappreziar, e statisticamain n'èsi betg admissibel da deducir da quai ina discriminaziun. Las commembras ed ils commembers d'ina gruppera che sa sentan dischavantagiads u discriminads, n'èn betg adina pronts d'infumar las autoritads vardaivlamain davart lur derivanza e davart lur identitat. Quai resulta dal rapport che vegn cità qua survart (pagina 14).

La metodica actuala da la Dumbraziun svizra dal pievel è pia avunda exacta per identifgar las minoritads a maun da la lingua ed a maun da la religiun. Perquai che la Dumbraziun svizra dal pievel è ina cumbinaziun da datas administrativas e d'enquistas da sondagi e perquai che l'Enquista da structura è obligatorica, pon ins partir dal fatg, che las datas registradas sajan da bona qualitad. Igl è dentant pussaivel, che tschertas gruppas da la populaziun na fetschian betg indicaziuns exactas davart lur appartegnientscha ad ina minoritad.

Il Comité consultativ supplitgescha las autoritads da far ils pass necessaris – en encleglientscha cun las partidas pertutgadas – per che l'Instituziun naziunala dals dretgs umans (INDU) s'accordia plainamain cun ils Princips da Paris. El recumonda a las autoritads da surdar a la INDU in mandat che cuntegna l'elavuraziun da recurs sco er autorisaziuns commensuradas da far inquisiziuns e resursas (recumandaziun en il paragraf 18 resp. 68).

L'octobre 2021 ha il parlament deliberà la basa legala per crear l'Instituziun naziunala dals dretgs umans (INDU) (Lescha federala dals 19 da december 2003 davart las mesiras per la promozion civila da la pasch e per il rinforzament dals dretgs umans). La INDU è concepida sco corporaziun da dretg public («uniun da dretg public»). Per far las preparativas necessarias per fundar la INDU, inclusiv elavurar in sboz dals statuts e convocar la radunanza constitutiva è vegnida nominada ina gruppera da lavur che ha salvà sias sesidas en intervals regulars dapi l'avrigl 2022. Questa gruppera da lavur sa cumpona da

representantas e representantants da la sociedad civila e da l'economia, da las autoritads federalas, da la Conferenza da las regenzas chantunadas (CdC) e da las cumissiuns extraparlamentaras consultativas dal Cussegl federal. La finamira da la gruppera da l'avor è stada quella, da possibiliter a la INDU da mantegnair il status A tenor ils Princips da Paris. Criteris sco il mandat da la INDU, sia cumposiziun, sia moda da l'avor e sia independenza, ha la gruppera da l'avor resguardà commensuradament. La radunanza constitutiva ha gî lieu ils 23 da matg 2023.

Tenor la lescha che furma la basa, sa drizza il mandat da la INDU tenor ils Princips da Paris. Sias incumbensas legalas èn las suandatas:

- infurmaziun e documentaziun,
- perscrutaziun,
- cussegliazioen,
- promozion da dialog e da collavuraziun,
- educaziun per la furmaziun en la domena dals dretgs umans e sensibilisaziun,
- barat internaziunal.

La INDU n'ademplescha dentant nagina funcziun da surveglianza u da mediaziun. Quai pervia da la separaziun tranter las cumpetenzas da la Confederaziun e las cumpetenzas dals chantuns. Ultra da quai duain vegnir evitadas interferenzas cun il mandat da differents auters posts da mediaziun. Il Cussegl federal, il parlament ed ils chantuns han perquai refusà l'idea d'in tal mecanissem. La pussaivladad d'acceptar recurs individuals è però in'opziun facultativa dals Princips da Paris e n'è betg ina premissa obligatorica.

Las novas disposiziuns legalas prevesan, ch'il Cussegl federal proponia a l'Assamblea federala in rom da pajaments per finanziar la INDU, che vala mintgamai per 4 onns. La missiva precisescha, che l'instituziun survegni mintga onn agids finanzials da la Confederaziun en la summa dad 1 million francs. Quai è però ina valur directiva che po vegnir adattada dal parlament. Ils custs per l'infrastructura da la INDU che cumpiglian particularmain las localitads, l'informatica ed ils custs da translaziuns, duain vegnir surpigliads cuminaivlamain dals chantuns.

Il Comité consultativ supplitgescha las autoritads d'explotar la legislaziun existenta per chastiar e per sancziunar efficaziamain l'exibizion publica da simbols che propagheschan e glorifitgeschan il naziunalsocialissem (recumandaziun en il paragraf 20 resp. 132).

Da la dumonda d'in scumond da l'utilisaziun publica da simbols naziunalsocialistics s'occupa actualmain il parlament svizzer tranter auter en connex cun differentas intervenziuns parlamentaras. L'Uffizi federal da giustia (UFG) ha preparà in rapport respectiv en chaussa, che preschenta la situaziun giuridica actuala areguard l'utilisaziun chastiabla e nunchastiabla da simbols naziunalsocialistics che discriminateschan las razzas e che glorifitgeschan la violenza e l'extremissem, che valitescha la pratica pertugant il basegn d'agir e che mussa ultra da quai ils avantatgs ed ils dischavantatgs da las pussaivladads giuridicas per in eventual scumond da l'utilisaziun da tals simbols. Il rapport ch'è vegni publitgà il december 2022, è arrivà a la conclusiun, ch'in scumond da simbols naziunalsocialistics che discriminateschan las razzas e che glorifitgeschan la violenza e l'extremissem fiss da princip pussaivel, sia realisaziun dentant giuridicamain e redacziunalmain pretensiua (cf. Uffizi federal da giustia, Verbot nationalsozialistischer, rassendiskriminierender, gewaltverherrlichender und extremistischer Symbole, Bericht zur Rechtslage und zu möglichen Varianten zur Umsetzung eines Verbotes sowie Darstellung der Vor- und Nachteile, 15 da december 2022, <https://www.newsd.admin.ch/newsd/message/attachments/74515.pdf>).

En il rom da la sessiun speziala il matg 2023 è il Cussegl naziunal s'occupà da duas intervenziuns respectivas (moziun 21.4354 Binder-Keller «Keine Verherrlichung des Dritten Reiches. Nazisymbolik im öffentlichen Raum ausnahmslos verbieten»; moziun 21.4046 Rüegger «Verbot der Verwendung von extremistischen, terroristischen und islamistischen Symbolen»). Concernent questa ultima moziun na vesa il Cussegl federal nagin basegn d'agir. La moziun 21.4046 Rüegger ha la moziunaria revocà ils 2 da matg 2023, la moziun 21.4354 Binder-Keller ha il Cussegl naziunal acceptà ils 4 da matg 2023. La Cumissiun per dumondas giuridicas dal Cussegl naziunal ha acceptà ina da las iniziativas parlamentaras anc pendentes (iniziativa parlamentara 21.524 Barrile "Verbot der öffentlichen Verwendung von extremistischen, gewaltverherrlichenden und rassistischen Symbolen"). Quella passa ussa a la Cumissiun per dumondas giuridicas dal Cussegl dals chantuns. Ensemen cun in'autra iniziativa parlamentara elavura la Cumissiun per dumondas giuridicas dal Cussegl naziunal in sboz respectiv (iniziativa parlamentara 23.400 da la Cumissiun per dumondas giuridicas dal Cussegl naziunal «Spezialgesetzliches Verbot der öffentlichen Verwendung von nationalsozialistischen Symbolen»).

Il Comité consultativ supplitgescha las autoritads da procurar, che las mesiras previsas per cumbatter ils crims per odi veginan realisadas efficaziamain, quai per garantir, ch'ils crims per odi cunter persunas che appartegnan a minoritads naziunalas e cunter autres communitads che viven en Svizra, veginan registrads en moda pli effizienta ed intercurids da la polizia sco er per garantir, che las delinquentas ed ils delinquents supponids veginan persequitads en moda ordinaria (recumandaziun en il paragraf 21 resp. 133).

Ils 5 d'avrigl 2023 ha il Cussegl federal communitgà d'elavurar novas disposiziuns legalas per regular las grondas plataformas da communicaziun. Las grondas plataformas da communicaziun duain en spezial veginr obligadas a dapli transparenza. Ultra da quai duain ellas nominar in post da contact ed ina preschentanza giuridica en Svizra. Plinavant duain ellas acceptar annunzias davart odi, davart preschentaziuns da violenza u davart smanatschas, examinar quellas ed infumar las utilisadras ed ils utilisaders davart il resultat. Sin dumonda duain ellas dentant er controllar, ch'i veginan stizzads cuntegns e bloccads contos. Per quest intent duain las grondas plataformas da communicaziun stgaffir e finanziar posts da reclamaziun interns ed in servetsch svizzer da mediaziun independent. Dal rest vali anc adina, ch'i vegin resguardà, che la derschadra u il derschader possia fixar il chasti per delicts concrets, sch'igl exista in element d'odi e sch'i vegin commess in crim.

Il Comité consultativ intimescha las autoritads da rinforzar lur stentas per cumbatter cunter ils crims per odi, tranter auter cun registrar datas classifitgadas che resguardan er ils motivs da crims per odi (recumandaziun en il paragraf 134).

Dapi l'onn 2009 registrescha la Statistica criminala da la polizia (SCP) – tenor princips da registraziun e d'evaluaziun unitars – ils delicts che veginan denunziads en Svizra sco er la quota da scleriment. Dapi l'onn 2021 veginan publitgadas datas differenziadas pertutgant l'art. 261<sup>bis</sup> dal Cudesch penal (CP). Questas datas permettan da furnir resultats davart il dumber dals delicts respectivs cunter discriminaziun pervia da motivs sco la razza, l'appartegnientscha etnica u religiosa ubain l'orientaziun sexuala. Da resguardar èsi, che la registraziun statistica dals crims per odi è fitg limitada en la Statistica criminala da la polizia, perquai che quella na registrescha betg ils motivs dals delicts. Ultra da quai na pon questi motivs per il pli betg veginr definids cleramain, cura ch'els veginan registrads en la Statistica criminala da la polizia.

Il Comité consultativ supplitgescha las autoritads federalas e chantunalas da sustegnair la producziun da programs da radio e da televisiun che han la finamira da promover la cultura, las tradiziuns e l'istorgia dals Jenics e dals Sinti/Manouches, e quai en stretga collavuraziun cun las preschentantas ed ils preschentants da quellas communitads. Plinavant duessan las autoritads prender mesiras da sensibilisaziun per las persunas che appartegnan a las minoritads dals Jenics e dals Sinti/Manouches, quai per las render attentas al mecanissem da reclamaziun e da surveglianza existent dal Cussegl svizzer da la pressa per cuntegns da medias (recumandaziun en il paragraf 22 resp. 145).

Las autoritads federalas ston crear cundiziuns generalas per radio e televisiun, quai per che radio e televisiun possian ademplir l'incarica da prestaziun da dretg constituzional tenor l'art. 93 al. 2 da la Constituziun federala da la Confederaziun svizra (Cst.). Uschia oblighescha l'incumbensa da program legala la SRG SSR tranter auter da promover la chapentscha, la coesiun ed il barat tranter las regiuns da la Svizra, tranter las cuminanzas linguisticas, tranter las culturas e tranter las gruppaziuns socialas sco er da resguardar las atgnadads dal pajais ed ils basegns dals chantuns (art. 24 al. 1 lit. b Lescha federala davart radio e televisiun (LRTV); cf. er art. 3 al. 4 Concessiun SRG SSR). A medem temp garantescha l'autonomia da program, che nagin na po pretender d'in emettur da programs da derasar tschertas preschentaziuns ed infurmaziuns (art. 6 al. 3 LRTV; cf. gia art. 93 al. 3 Cst.). Las obligaziuns tematicas da la SRG SSR areguard resguardar las minoritads pon pia esser mo da natira fitg generala.

En il rom da la promozion dal film sustegna l'Uffizi federal da cultura UFC projects che gidan ad obtegnair ina purschida multifara da films svizzers u da coproducziuns svizras. Dacurt ha il UFC promovì in film documentar davart il tema menziunà en la recumandaziun, che vegin mussà en ils kinos e sin festivals («Ruäch – eine Reise ins jenische Europa»).

Il Comité consultativ intimescha las autoritads federalas e chantunalas da canticuar cun lur stentas per sustegnair la radiodiffusio e las medias stampadas en talian ed en rumantsch en il chantun Graubünden/Grischun/Grigioni (recumandaziun en il paragraf 146).

Il sustegn da las medias en talian ed en rumantsch en il chantun Graubünden/Grischun/Grigioni è e resta in giavisch central en il senn da la protecziun da las minoritads e serva a rinforzar l'identidad, a tgirar ed a sviluppar vinavant las linguis ed è la finala er impurtant per la diaspora. La promozion tras

la Confederaziun è reglada tras cunvegna da prestaziun. Ils credits correspondents vegnan fixads dal parlament en il rom da la debatta davart la missiva da cultura 2025-2028.

#### 4. Recumandaziuns dal Comité consultativ en il sectur da la participaziun

##### 4.1 Participaziun en general

En differentas recumandaziuns suppligescha il Comité consultativ las autoritads d'integrar pli fitg represchentantas e represchentants da las minoritads naziunalas en las fatschentas che pertutgan las minoritads (cf. recumandaziun en il paragraf 17 resp. 63, 19 resp. 87, 23 resp. 205, 101, 206).

Sco menziunà en il rapport cumbinà da la Svizra da l'octobre 2021, datti en Svizra vastas pussaivladads per ina participaziun politica sin tut ils plauns federais. Sin plau federal han las federaziuns da las minoritads la pussaivladad da prender posizion durant la fasa preliminara da proceduras legislativas. La missiva da cultura 2025-2028 che fixescha la strategia per promover ils Jenics ed ils Sinti, vegn per exemplu preschentada al public a chaschun d'ina consultazion publica. En quest rom vegnan consultadas er las organisaziuns dals Jenics e dals Sinti ed uschia vegn ins a savair lur basegns per promover en moda efficacia lur cultura e lur istoria.

Sco menziunà en il rapport cumbinà, datti posts spezialisads specifics en singuls chantuns, quai correspondantamain a las recumandaziuns dal Comité dals ministers. Dacurt è in tal post vegnì endrizzà er en il chantun Berna. Quest post intermediescha tranter ils Jenics, Sinti e Roma cun moda da viver nomada, las autoritads chantunalas, las vischnancas e las differentas parts interessadas u pertutgadas e serva sco contact per tut las dumondas davart la moda da viver nomada en il chantun.

Las differentas recumandaziuns ch'il Comité consultativ ha fatg areguard la participaziun, cuntegnan ulterius aspects. En quest regard accentuescha la fundaziun «In futur per ils viagiants svizzers», che la participaziun efficacia da las minoritads prestia contribuziuns essenzialas a favur da la coesiu sociala ed a favur da la convivenza paschaivla. Quant enavant che las recumandaziuns pon vegnir realisadas, pretenda in'examinaziun minuziosa tras ils posts ch'en competents per quai sin plau federal, chantunal e communal. En quest connex sa tschentan er dumondas concernent la represchentanza d'ina cuminanza, sco quai ch'il chantun Grischun ha per exemplu fatg valair. Plinavant ston er vegnir considerads las resursas avant maun ed il basegn da persunal necessari, sco quai ch'il chantun Turitg ha remartgà. Ubain er quant enavant che la participaziun sto vegnir limitada a las minoritads naziunalas ch'en renconuschidas en Svizra, sco quai ch'il chantun Tessin ha menziunà.

A regard la dumonda da la participaziun, fa il chantun Neuchâtel danovamain attent al fatg, che sia procedura da legislaziun tar la *Loi sur le stationnement des communautés nomades (LSCN)*, ch'è menziunada en il tschintgavel Parairi, na saja bain betg vegnida precedida d'ina consultazion externa, mabain che avant la deliberaziun da la lescha hajan senza auter gi lieu discurs cun intgins represchentants da la cuminanza nomada.

##### 4.2 Mesiras concernent la pandemia da COVID-19

En connex cun las mesiras ch'en vegnidas prendidas per mitigiar las consequenzas socio-economicas da la pandemia da COVID-19, spezialmain per persunas che appartegnan als Jenics e Sinti/Manouches, suppligescha il Comité consultativ las autoritads d'evaluar las mesiras en stretga collauraziun cun las minoritads pertutgadas e d'eliminar eventuais deficits (cf. recumandaziun en il paragraf 88).

Sco menziunà en il rapport cumbinà, èn Jenics, Sinti/Manouches e Roma cun moda da viver nomada, cunzunt ils Jenics e Sinti/Manouches che vivan en Svizra, stads pertutgads particolarmain ferm da la crisa da COVID-19. Da realisar lur moda da viver nomada era considerablamain pli difficil; cunzunt il cumenzament da la pandemia, cura che tschertas pazzas da staziunament uffizialas èn vegnidas serradas e cura ch'igl è vegnì scumandà – en il rom da l'uschenumnada permissiun per il commerzi ambulant – en tschertas regiuns d'exequir activitads professiunalas. Gia il mars 2020 han la fundaziun «In futur per ils viagiants svizzers» e l'Uffizi federal da cultura (UFC) fatg recumandaziuns a tut ils posts chantunals e communals ch'en competents per las pazzas da staziunament per Jenics, Sinti e Roma cun moda da viver nomada, quai per reducir las consequenzas da la crisa per questas gruppas e per prender mesiras da protecziun en l'administraziun da las pazzas. Silsuenter èsi vegnì previs explicitamain en l'*Ordinaziun da COVID-19 2 dal Cussegl federal*, che las pazzas da staziunament uffizialas per las persunas cun moda da viver nomada restian avertas, sch'ellas disponan d'in concept da protecziun cunter il virus. In tal concept ha la fundaziun «In futur per ils viagiants svizzers» – en

enclegentscha cun la Confederaziun – mess a disposiziun als chantuns ed als gestiunaris da plazzas da staziunament a partir dals 15 da matg 2020. Ultra da quai avevan Jenics, Sinti e Roma cun activitat da gudogn independenta il dretg da survegnir indemnisaions da la perdita da gudogn. Ina purschida da cussegliazion en cas da difficultads finanzialas sco er d'agid finanzial è vegnida endrizzada en collauraziun cun in'organisaziun jenica e cun il sustegn finanzial d'autoritads e d'organisaziuns da beneficenza.

La Confederaziun ed ils chantuns han laschè far differentas evaluaziuns pertutgant las mesiras cunter COVID-19 ch'èn vegnidas prendidas, uschia er per las mesiras da sustegn en il sectur cultural. Las evaluaziuns n'hàn mess nagin focus specific sin la situaziun da las personas che appartegnan als Jenics e Sinti/Manouches. Tuttina han ils resuns ch'èn resultads en il rom da l'activitat da cussegliazion da la fundaziun «In futur per ils viagiants svizzers» mussà, che la crisa da COVID-19 ha manà a la glisch las largias existentes en il sistem e la vulnerabilitat da bleras personas cun moda da viver nomada. Per il cumentzament da l'onn 2022 è silsuenter vegnida endrizzada ina purschida permanenta da cussegliazion sociala tar la fundaziun «In futur per ils viagiants svizzers». La finanziazion da la purschida è garantida ad interim per 4 onns. Suenter bunamain in onn d'activitat operativa sa mussi, ch'il concept da cussegliazion generescha ina gronda dumonda ed ha ina vasta acceptanza.

## 5. Recumandaziuns dal Comité consultativ en il sectur da las minoritads linguisticas

Bleras recumandaziuns dal Comité consultativ che pertutgan las minoritads linguisticas, correspundan a la pratica vertenta. Uschia èsi l'incumbensa da la Chanzlia federala da fixar – en enclegentscha cun la Chanzlia chantunala dal chantun Graubünden/Grischun/Grigioni e cun la *Lia Rumantscha* – tge infurmaziuns che duain vegnir translatadas en rumantsch (recumandaziun en il paragraf 152). La Confederaziun sostegna er l'instrucziun en rumantsch en il chantun Grischun ed en il rest da la Svizra. Plinavant sostegna ella l'elavuraziun da maturitads bilinguas cun talian sco er l'elavuraziun da meds d'instrucziun en talian ed en rumantsch (recumandaziun en il paragraf 193). Sin basa da la Lescha da linguas sostegna la Confederaziun ultra da quai gia oz la preschientscha dal talian en ils fatgs da fumaziun (recumandaziun en il paragraf 215).

La promozion respectivamain il rinforzament da la plurilinguitad en l'administrazion federala, tranter auter cun la finamira da cuntanscher ina represchentanza equilibrada da las cuminanzas linguisticas (particularmain per emploiadess ed emploiadess talians e rumantschs), sco er da meglierar las competenzas linguisticas dal persunal (recumandaziuns en ils paragrafs 151 e 214), correspundan a las Finamiras strategicas dal Cussegl federal 2020-2023 per promover la plurilinguitad entaifer l'administrazion federala. Perquai vegni registrà cun plaschair, ch'il Comité consultativ ha prendi enconuschientscha cun bainvulentscha da las stentas permanentas da las autoritads federalas.

Concernent la recumandaziun dal Comité consultativ per las minoritads tudestgas (recumandaziun en il paragraf 216) ha la Svizra prendi posiziun cun examinar la realisaziun da la Charta europeica da las linguas regiunalas u minoritaras (8avel ciclus da rapport) ed ha expligtgà là, pertge ch'ella refusa questa recumandaziun. La Svizra vegn a preschentar danovamain sia posiziun en il rapport intermediar concernent la realisaziun da la Charta da las linguas regiunalas u minoritaras ch'ella sto inoltrar proximamain.